

四庫全書

集部

欽定四庫全書

梁谿集卷八十六

宋 李綱 撰

表劄奏議四十八

畫一措置賑濟歷并繳奏狀

乞將贍給丘贇軍錢糧充申世景支遣奏狀

乞將本路災傷州縣合起折帛錢依條限催納

奏狀

乞催起岳飛軍馬劄子

畫一措置賑濟歷并繳奏狀

契勘本路去歲旱災尤甚今正當新陳不接之時米價
翔踊細民闕食下戶流移無本耕種上軫聖慮屢降德
音督責監司守令廣行賑濟今月二十二日被受御筆
詔書節文令帥守監司多方勸誘積米之家以其食用
之餘盡數出糶庶幾濟此流殍數月之苦當日又准尚
書省劄子備奉聖旨指揮節文停蓄之家尚敢不從勸
誘依前閉糶量度輕重一面斷遣除已備錄全文印榜

曉示外今具遵依聖訓措置勸誘下項

一本路逐州軍使司各置印歷一道差官分詣委自知通行下諸縣每縣州給印歷一道備錄使司指揮差官分詣監督令佐分定鄉分躬親就鄉詢究的實有米人戶使其自陳截自指揮到日見有積米之數許乞存留若干食用外其餘盡數依市價量減施行出糶責令隣保對定着實有米人戶於歷上親書着字所委官限五日周遍赴縣攢數令

佐就歷同書結罪次日繳納本州本州總諸縣之
數抄上使司給到文歷內除認數不多或認數多
見得已是情願出糶之人更不須召赴本州外將
自餘有米數多責認未定之人仰縣令將帶同赴
本州知通限當日審實更加勸誘合存合糶數目
如有認糶米數三千石以上依得二月八日檢會
到紹興元年五月十四日該補官資之人即取縣
官保狀當官先次給與空頭付身候糶足日赴州

書填其以次數多之人糴及二千五百石與補進
勇副尉二千石與補守闕進勇副尉一千五百石
與免將來差科三次一千石與免將來差科二次
五百石與免將來差科一次如敢吝惜不肯出糴
拒抗官司之人審究見在着實盛頓米穀去處盤
量見數具情節申取使司指揮當議酌情斷遣枷
項號令

一州縣已勸誘到上戶及有米之家出糴米數每升

依逐處市價減十五文出糶遇市價減落再令量減將城郭鄉村之家給歷每口不過一升分定出糶人戶乏食之家齎歷或五日或十日一次前去糶米其有米之家收錢糶米並書歷着字為據不即時出糶許糶米人赴官申陳候糶絕日計數申官司取歷照驗結算都數如有糶糶不實諸般欺弊搔擾並委知通縣令檢察施行

一今來勸誘上戶及積米之家減價出糶止是可濟

有錢糴米之人其流移飢民與下戶無錢糴米之人官中見行賑濟支過米數已多前去秋成尚遠難以接濟今措置委自知通縣令多方勸誘上戶及有積米之家如有情願納錢米入官以助賑濟者許以其入納之數陳乞官告度牒之類依價折還一戶所納價直不足即許衆戶結甲同共細計陳情其入納數目浩漣之人當議特行奏請優與推恩亦仰願入納人戶於歷上親書着字為據其

入納米即於出糶米內除豁施行仍依紹興五年十二月十日本路轉運司已得勸誘入納指揮許候受付身訖作官戶免身丁等事

一今來勸誘止係上戶有物力及停蓄積米之家其中下戶有些小食用米穀即不得一例前去巡門抄劄以至搔擾

一縣官親詣諸鄉詢究有米之家責令隣保對定合存留食用并合出糶之數務要不擾取見的確若

有失實或因緣為姦稍涉違戾作弊並從諸司按察移文本司備申朝廷先次差替取勘施行

一縣官親詣鄉村檢察所帶人從不得過十人每人日支米二升錢五十文省不得容縱作過并差公人弓手下鄉因緣搔擾使司除已差人密行體探外委自知通覺察申舉公吏並行決配

一勸誘厯到限十日勸諭了當其地遠戶多縣分許量展日限摺角實封專差人齎詣使司聽候指揮

其給歷糶糶即仰一面措置施行

錄白畫一繳奏狀

右臣今月二十二日准御前金字牌降到親筆手詔及
同日又准金字牌降到尚書省劄子指揮勸誘積米之
家出糶米斛接濟飢貧下戶等事臣除已遵稟聖旨同
轉運司官商議措置備錄印造文牒及措置到勸誘畫
一事件各置印歷一道專差人齎付洪虔等一十一州
軍收管差委強幹官分下諸縣逐一依應多方勸誘務

要實惠及民接濟下戶仍令多印文牒散給鄉村曉示
去訖臣竊慮逐州當職官不切遵稟奉行減裂亦已分
差官前去諸州逐一檢察如有違戾去處別具因依奏
劾施行外今錄白措置勸誘畫一事件一本在前

小貼子

臣契勘今來勸誘減價出糴米斛止是可濟有錢糴
米之人其流移飢民無錢糴米官中見行收養見在
米數不多前去秋成尚遠難以接濟及下戶無本可

以種田之人官中亦無錢米可以借貸臣已行措置
勸誘上戶有物力之家如有情願納錢米入官以助
賑濟借貸者許以其入納之數陳乞官告度牒之類
依價折還若入納數目浩漭之人別行奏乞優與推
恩外伏望聖慈許臣候見得有入納之數逐旋具合
折還官告度牒等申奏朝廷乞行給降仍乞依紹興
五年十二月十日本路轉運司已得勸誘入納指揮
許候受付身訖作官戶免身丁等事庶幾易於激勸

飢民不至乏食下戶可以趁時耕作將來秋成可望
不誤歲計

臣契勘勸誘糴米依先降指揮及三千石已上各有
補授名目外其不及三千石之數即未有明文竊慮
無以激勸臣已相度一面行下諸州勸誘如糴及二
千五百石與補進勇副尉一千五百石與免將來差
科三次一千石與免差科兩次五百石與免差科一
次外欲乞候見得有出糴及上項數目之人除免差

科從本司給據行下州縣施行外其補進勇副尉及
守闕進勇副尉許臣一面出給公據具姓名奏朝廷
乞給降付身伏望聖慈特降睿旨施行

乞將贍給立贖軍錢糧充申世景支遣奏狀

契勘近蒙朝廷差申世景一軍前來洪州駐劄權聽本
司節制使喚所有合用錢糧臣已一面牒漕司契勘將
元養立贖軍錢糧窠名應副及具因依奏聞乞下轉運
司椿撥去訖近又承漕司回文行下洪州椿辦支給今

月初六日續准尚書省劄子節文為承都督行府關欲將丘贊一軍合用錢糧內米依數樁留充申世景支遣外其合用錢數令江西帥司依舊應副津發前去岳飛軍前三月二十二日奉聖旨依其申世景合用錢令戶部科撥申尚書省契勘申世景人馬已到洪州見用贍給丘贊錢糧窠名日旋收樁支給尚自不足所有本路諸州應諸色上供經制折帛係省不係省等錢一切盡係漕司拘樁指定科撥充岳飛大軍等支用除外別無

支使不盡窠名寬刺錢物兼本司所賣鈔引內除廣鹽鈔已住罷及礬引出賣不行外雖茶引稍有客人入納節次准朝廷支降應副轉運提點等司即目猶有積壓下八萬餘貫未支竊慮戶部不見得本路別無空閒名色錢物料撥虛數行下無可取撥有誤軍食伏望聖慈詳酌臣前奏及今狀事理特降睿旨只乞將元贍丘贍軍錢充申世景支遣其丘贍合用錢數却乞將元應副申世景錢從朝廷支降徑發輕齎往岳飛軍前庶幾不

致防闕

乞將本路災傷州縣合起折帛錢依條限催納奏

狀

右臣今月初四日到本任交割職事初六日承都轉運
司公文准尚書省劄子節文勘會本路合發折帛錢元
責限三月椿足係指擬應副大軍欲督責兩漕臣拘催
日下並要起發盡絕奉聖旨依仍展十日檢准紹興勅
諸稅租日限江南東西路夏料五月十五日起催八月

十五日納畢又勅諸人戶輸納有期限而官司輒促其常限者徒一年因至逃亡加一等洪州於去年十二月九日准尚書省劄子勘會江西合納夏稅及和買物帛每歲例係量度分數折納價錢其紹興六年分人戶折納之數未曾立定折納之數理合預行措置以便人戶輸納十二月八日奉聖旨除准衣并絲更不折錢外其餘紬絹綿並以十分為率絹二分紬四分綿三分仰趙子直預先依此分明開坐行下所部州縣候來年合入

輸納物帛條限即依今來立定名色分數折納見錢仍
仰從第四等已下人戶折納如不足即通第三等人戶
納錢其合納本色物帛亦仰依限催理送納起發前去
郢州今年二月初三日本州承轉運司公文准諸路軍
事都督行府劄子節文今歲合起折帛錢限三月已前
收樁數足計置發往郢州下卸今來又承前件三月二
十九日指揮合至四月初十日限足竊緣被受指揮已
四月初八日其折帛錢雖已行下催促並未納到必致

有違朝限臣契勘本路人戶合納今年夏稅和買物帛朝廷元降指揮立定分數從第四等已下折納價錢依條限催理係是優恤下戶以便輸納今來摧納限至四月十日了畢正是蠶麥未熟新陳不交之時下戶何由了納況本路所管諸州去年亢旱尤甚洪吉筠袁江撫州興國臨江軍皆是災傷至重去處所有第四等已下人戶多是貧困官中見行抄劄給米賑濟之人何緣更有積蓄非時預行輸納若復州縣逐急措置先從上戶

有力之家預催折納見錢即將來合輸本色之數却當
於第四等已下人戶催科顯見重困必至流移所害非
細臣竊讀近降親筆詔書令勸誘積米之家出糶以濟
流殍之苦加惠元元誠意惻怛今來所降指揮如此何
以取信於民伏望聖慈特降睿旨將本路災傷州縣合
起折帛錢依條限催納其不係災傷去處自依今來立
限指揮庶幾下戶得被實惠不致逃亡臣已行下災傷
州縣更切聽候朝廷指揮外見不妨本職待罪

乞催起岳飛軍馬劄子

臣訪聞岳飛已丁母憂飛孝於其親將來朝廷起復辭免往來必費日月伏乞早降處分兼諸路錢糧多起發往郢州交卸勢須先屯重兵及措置倉庫安頓去處又自漢沔至郢州千有餘里與偽境相隣須有軍馬防護糧道方可無虞臣仰荷眷知苟有所聞不敢不奏伏望聖慈特降睿旨速賜施行

梁谿集卷八十六

欽定四庫全書

梁谿集卷八十七

宋 李綱 撰

表劄奏議四十九

措置招軍畫一奏狀 謝賜銀合茶藥表

謝還賜玉帶牙簡等表

乞兵於舒蘄黃州駐劄奏狀

措置招軍畫一奏狀

准樞密院劄子諸路軍事都督行府關樞密院關內降

付下新江南西路安撫制置大使李某劄子奏臣契勘
朝廷昨降江南西路安撫制置大使畫一指揮差兵二
萬人紹興三年分有兵一萬八千人後來節次撥隸都
督府韓世忠岳飛等軍四年分有兵一萬五百人五年
二月內指揮除存留丘贊一軍外自餘軍馬並撥付岳
飛今來本司所管丘贊軍馬不滿二千人馬一百餘疋
近又撥隨岳飛前去使喚雖蒙朝廷却差申世景軍馬
於本路駐劄纔千餘人馬數十疋竊見江西路分控扼

上游與淮南相接道里不遠昨來金人賊馬渡江首犯
洪撫等州李成馬進等亦破江州侵犯洪筠蓋緣兵力
單弱不能捍禦朝廷灼見利害因建大使付以重兵使
任一路之責累年脔削存留僅及十分之一又皆疲弱
之兵緩急不可倚伏萬一強敵侵陵江上不知何以使
之鎮撫要害之地況今虔吉盜賊累年出沒作過為患
數路討蕩未平非有可用軍馬卒難殄滅臣未敢乞依
元降畫一指揮差撥數足若蒙朝廷先次差撥一半使

及萬人庶使稍成軍制可以倚仗伏望聖慈特降睿旨
選差近上統制官將帶所部軍馬赴本路駐劄聽臣節
制與申世景軍馬通計人數其餘乞許臣踏逐申朝廷
抽差庶幾訓練習服軍聲稍振可以鎮壓一路折衝禦
侮少副陛下委任之意右關送諸路軍事都督行府右
勘會大兵見今屯駐江淮應援措置防捍欲將本路見
闕禁軍令帥司措置招填闕額除本路將兵自合全將
專聽帥司差撥外據本路不係將兵見管人存留一半

本處使喚餘一半令大使司選差逐州軍兵官一員別作一項訓練遇春秋從帥司勾抽本司按閱若遇緩急合要人兵使喚即行勾抽與已差申世景官兵相兼使喚如赴帥司按閱及緩急差撥其軍兵並依例分擘衆糧外每日添支食錢五十文候將來防秋日即相度調發軍馬前去本路已上所差禁軍並係本路人額其錢糧自合本路應副合用軍器令帥司一面措置造作支用如有合行事件條具申取朝廷指揮今關送樞密院

指揮右劄送本司依都督行府關到事理施行本司契
勘昨置安撫制置大使降到畫一指揮差兵二萬人係
在本路係將不係將兵之外今來所乞二萬人一半人
數蒙朝廷降到都督行府指揮候將來防秋日調發前
去却令措置招填本路係禁軍闕額今依應開具闕額
人數并措置招填事件下項

一係將兵一十指揮計五千一百人已有三千九百
三十三人見闕一千一百六十七人

虔州八指揮見管三千三百六人見闕一千四十
四人

吉州兩指揮見管八百九十七人見闕一百二十
三人

己上將兵承今來指揮令帥司措置招填闕
額自合全將專聽帥司差撥使喚欲乞令逐
州並本將限一季據闕額招填如招填不足
即從本司措置量增例物招填訖發付本將

填闕

一不係將兵共二十一指揮計七千五百四十一人
已有三千三百三十五人見闕四千二百六人
洪州七指揮見管六百一十七人見闕二千三十
三人

江州三指揮見管四百六十四人見闕五百三十
三人

撫州兩指揮見管七百四十一人見闕一百七十

九人

筠州一指揮見管二百五人見闕一百五人

袁州一指揮見管三百一人見闕九人

臨江兩指揮見管三百五人見闕三百六十二人

建昌軍兩指揮見管二百六十八人見闕三百九

十九人

興國軍兩指揮見管一百八十四人見闕五百六

人

南安軍一指揮見管二百五十人見闕六十人

已上不係將兵承今來朝廷指揮令帥司措置招填闕額存留一半本處使喚餘一半令本司別作一項訓練勾抽使喚欲乞令逐州限一季據闕額招填如招填不足即從本司措置量增例物招填訖發赴本軍填闕

一契勘本路自來招填禁軍每名例物錢三貫文絹一疋今來物價高貴竊慮無人肯就招填今欲

將諸州闕額人數每名增錢一貫文作四貫又
絹一疋今紐計招填係將不係將共闕五千三
百七十三人合用錢絹下項

絹五千三百七十三疋

契勘轉運司見有本路上供絹一萬七千餘疋
於洪州軍資庫樁管欲乞於數內截撥五千三
百七十三疋樁充前項招軍例物支用

錢二萬一千四百九十二貫文

契勘本路諸州各有總制司錢與應副月椿大
軍錢糧窠名不妨礙欲乞通融一路從本司取
撥充前項招軍例物支用

一契勘本路合招填闕額禁軍五千三百七十三人
今約合用錢糧下項

每一月合用

糧米六千八百七十七石六升

料錢一千五百六十八貫文

衣賜

春衣

絹一萬七百四十六疋

紬八百四十疋

布三千一百一疋二丈

隨衣錢七千二百一十一貫六百四十一文

冬衣

絹一萬一千四百六十疋三丈

紬二千六百八十疋二丈

布八百四十一疋

綿六萬五千一百九十一兩

隨衣錢五千九百九十五貫一百九十三文

一歲通計合用

糧米八萬二千五百二十四石七斗二升

料錢一萬八千八百一十六貫文

絹二萬二千二百六疋三文

紬三千五百二十七疋二丈

布三千九百四十二疋二丈

綿六萬五千一百九十一兩

隨衣錢一萬三千二百六貫八百三十四文

已上合用錢糧等數目浩瀚緣諸州所入財

賦有限並係轉運司括責扣撥令認定月椿

應副岳飛等大軍支遣除外別無贏餘窠名

錢物今承朝廷指揮招填闕額禁軍並係本

路人額其錢糧自合本路應副若非特降指
揮本路漕司通融應副即逐州既無可指擬
贍養必不能遵奉招填額足欲乞候招到人
數目令轉運司據招填到人數應副

一契勘本路帥司以前自造到器甲昨係本司統制
官祁超等軍馬關借披帶使用其逐項官兵節
次抽摘赴都督府岳飛軍前盡數將帶前去見
今闕乏今承朝廷指揮合用軍器令帥司一面

措置造作使用如有合行事件具條申取朝廷
指揮本司見開坐名件行下諸州令依應造作
外所有合用錢物欲乞朝廷特降新法度牒二
百道應副支用候將來支絕日再行申請

謝賜銀合茶藥表

臣某言伏蒙聖慈特降中使傳宣撫問仍賜銀合茶藥
臣已望闕謝恩祇受訖者祇奉明綸起臨江渚遠迂膚
使來自日邊丁寧訓勞之辭稠疊寵綬之禮王靈所逮

士論增榮

中謝

伏念臣頃以衰頹久安閑散誤應方面

之寄適當旱暵之餘倉廩無儲士多飢色潢池有盜民
未奠居自慙報效之遲敢意撫存之厚靈芽貢於北苑
珍劑出於尚方併沐匪頒式昭殊獎此蓋伏遇皇帝陛
下明並日月德合乾坤憫臣下之勤勞極朝廷之禮貌
致茲異數濫及非材臣敢不勉自激昂少圖報稱滌除
煩渴期有慰於人心蠲治沈疴益務求於民瘼

謝還賜玉帶牙簡等表

臣某言伏蒙聖慈以臣進到太上皇帝所賜玉帶玉束帶牙笏一面御畫二軸特降睿旨還賜臣已望闕謝恩祇受訖者抗章有請願還御府之珍被旨弗俞復拜匪頒之寵賜雖云舊命實維新中謝伏念臣遭遇休辰嘗與尚方之珍賜奔馳一紀惟知什襲以祕藏奉以周旋不敢失墜荷明恩而入覲蒙清問之下詢寶氣騰輝期復歸於天上物華得地庶不落於人間伏蒙皇帝陛下體聖與仁寶慈及儉眷憐迂拙嘗調護於兩宮寵賁衰

遲特便蕃於三錫仍頒舊物庸示新恩而臣晚景無堪
難當異數壯心未已願效微勞粹質溫純自慙比德之
非稱古製正直誓將擊賊以奚難臣無任

乞兵於舒蘄黃州駐劄奏狀

勘會淮西蘄黃三州昨奉聖旨聽本司節制其逐州係
在江西大江之北各與偽齊地分鄰接正是緊要重地
先蒙朝廷除岳飛兼節制逐州緩急有以捍禦本司近
為岳飛已奉聖旨改授湖北京西路宣撫副使即上項

三州並本路沿江興國軍江州並未有措置隄備竊慮賊情不測別生窺伺遂具狀申朝廷乞速降睿旨措置施行續准都督行府樞密院劄子備奉聖旨令岳飛依舊兼行節制蘄黃三州本司照對除蘄黃州係岳飛兼行節制外所有舒州元係淮西宣撫使司地分逐州即目並無軍馬防托緣防秋在近唯江西沿江一帶接連舒蘄黃等州全然未有兵備今來岳飛大軍將行起發往襄陽府劉光世大軍將行起發往廬州即舒蘄黃州

愈更空虚若不預行措置深慮外寇乘間侵軼緩急無可支梧所繫利害非輕欲望聖慈詳酌特降睿旨下岳飛分撥軍馬四千人差近上統制官於蘄黃兩州駐劄劉光世分撥二千人差近上統制官於舒州駐劄將來防秋有警並許聽臣節制使喚庶幾臨時不致誤事

小貼子

臣契勘黃州對江南岸係鄂州武昌縣接連江西興國軍界正是本路控扼要害去處其武昌係屬湖北

地分每遇防秋蒙朝廷降指揮專委湖北帥臣固守
欲乞朝廷更賜指揮劄下湖北路帥司預行措置武
昌沿江一帶水陸備禦之計庶幾緩急不失事機

梁谿集卷八十七

欽定四庫全書

梁谿集卷八十八

宋 李綱 撰

表劄奏議五十

乞移總管虔州措置捉殺盜賊奏狀

乞下都督行府催促遣兵奏狀

論賑濟劄子
乞差軍馬劄子

乞宮觀奏狀
乞宮觀劄子

催差軍馬劄子
乞截留王彥軍馬奏狀

乞移總管虔州措置捉殺盜賊奏狀

勘會本路虔吉州管下民俗獷悍平日狃習為盜前後累蒙朝廷并本司遣發軍馬節次招補過賊徒不少尚有餘黨時復嘯聚出沒不常緣虔吉州盜賊皆係土居頑惡不逞之人即與潰兵遊寇事體不同每有竊發動以千計所屬巡尉勢力不加便敢輕犯州縣肆行猖獗若聞重兵到來即復遠遁潛伏山谷官兵纔退依舊作過今來若非專差兵將於逐州閱習訓練就近措置卒

難殄滅照對本路所管東西第六將兵係在虔吉州住
營截日見管三千八百餘人及逐州各有土豪可以駕
御使喚本路有馬步軍副總管康隨合通管一路係將
不係將軍兵可以專委前件職事兼本官見奉都督行
府指揮差措置虔吉州界盜賊本司今相度欲權暫移
副總管康隨前去駐劄專切提督兩州兵將依時訓練
教閱武藝修治器甲及招填闕額人兵務要精熟足備
仍就近取會見作過盜賊頭項如承闕報即一面斟量

調發措置招捕及申報本司其所至巡尉并將兵並聽
節制使喚庶幾兇頑之徒知所畏憚漸可消弭本司除
已一面劄下隨依應起發前去外須至奏聞者

乞下都督行府催捉遣兵奏狀

契勘本司近為節次承據提刑司及虔吉州南安臨江
軍等處申報管下見有諸頭項賊徒結集作過乞兵收
捕本司已逐急差親兵權統領王彥將帶所部三百人隨
逐副總管康隨前去措置招捕虔吉州南安軍未獲賊

徒及分遣申世景官兵二百人令將官王勝部押前去
臨江軍新淦縣措置鄒烏八等賊徒及於本軍差撥將
官馬仙押三百人往吉州措置管下見作過盜賊外緣
本司見存軍兵大段數少今來作過賊火頭項不一委
是關兵分撥前去捉殺已節次開具賊首姓名申奏朝
廷及都督行府乞於近便處摘那差撥兵將三二千人
前來相兼使喚續准都督行府四月二十四日關勘會
行府見議遣兵前去至今未蒙差到今又據逐處申報

有賊徒結集作過緣今來正當栽插收割禾稻之際竊慮諸處盜賊輕視帥司官兵單弱恣行劫掠使良民不安居有失歲計須至奏聞者 右謹件如前欲望聖慈詳酌本司累奏并今狀事理速降睿旨下都督府催促摘那兵將二三千人前來本司應副相兼使喚庶幾防秋已前乘早撲滅免致滋蔓難制

小貼子

契勘虔州界見有魯六冠曾大喉黃鉞鑽魯九唐四

謝鬼七李洪劉宣吳添廖一長劉十二譚十二蕭破
洞謝大小鬼青唐賊包十九等并燒劫龍南縣等賊
吉州界有曾太保郭少二尹使者周花二譙花三易
十二羅大蕭安世等袁州界有王權蘇軍九等南安
軍有何少七吳守傳李收李迴等臨江軍新淦縣界
鄒烏八等除謝鬼七已遁鄒烏八王權已殺獲外所
有上件未獲賊徒姓名已係前狀開具奏聞去訖伏
乞睿照

論賑濟劄子

臣昨者入覲伏蒙聖慈宣諭江西旱災飢民闕食使之推行賑濟及至境上又奉親筆詔書令勸誘積米之家以其食用之餘盡數出糶以濟流殍之苦臣仰體天意敢不夙夜自竭以奉詔旨自到本路與監司協力行移州縣凡有流徙闕食之民通融斛斗盡令給米收養共賑濟五萬九十二人又給厯州縣遣官檢察令勸誘積米之家減價出糶米麥穀二十一萬八千一百二十四

石五斗其間亦有願入米麥以助官中賑濟者臣已各
項開具數目別狀奏聞訖契勘本路連年旱歉去歲尤
甚臣到任之初米一升價錢至一百三四十文近來雨
澤霑足早禾已熟米價頓減新米一升止四五十文將
來秋成決有可望之理此蓋陛下勤恤民隱至誠惻怛
聖德感召和氣之所致然今春小民乏本田畝有不曾
種蒔者甚多人情方蘇未宜重取更望朝廷寬假有以
涵養之乃為得計昔周宣遇戕而懼側身修行而王化

復行前日早曠安知不為中興之資在陛下特加聖意而已干冒天威不勝戰越

乞差軍馬劄子

臣竊見江西路環數千里為郡十有一為縣五十有三控引荆湖襟帶吳越為上流重地去淮南京西道里不遠平時商旅由獨木渡江自光蔡以趨汴都最為徑捷當六朝時九江豫章皆為重鎮屯兵選帥以臨之今朝廷保據江左審察形勢知此地之要害故與江東荆湖

皆置大使付兵二萬假以重權錢糧優裕贍養不闕所以崇屏翰之勢為長久之策也近年以來軍馬撥隸他將錢米隨亦轉移疆場蕩然無捍禦之備倉廩枵然無蓄積之資而猶建置大帥是有名而無實其失本意遠矣且以江東荆湖論之建康有張俊一軍當塗有劉光世一軍武昌有岳飛一軍猶足以奮張軍聲以為翰蔽江西一路獨無兵將沿江上下千里之間殊乏控扼使敵人不來則已如其果來必乘間擣虛則無如江西者

矣譬猶邪氣之傷人必由間隙盜賊之妄意必出無備
豈可忽哉臣昨者入對嘗具劄子乞元降畫一指揮軍
馬錢糧之半伏蒙聖慈察見本司有矜從之意降付朝
廷至今未蒙應副臣非不知方朝廷措置淮甸恢復京
東西未暇及此然但知進前不知備後非策之得也今
沿江所屯數十萬衆摘萬人以為一路根本似未為多
臣昨自行在將帶到申世景一軍纔千餘人分遣討捕
盜賊已差出三分之二見今諸郡竊發者紛紛未已正

緣兵力單弱不能鎮服所致而欲使之捍禦大敵豈不
難哉雖依近降指揮招補闕額禁軍然未經訓練何可
倚仗非得正兵相兼使喚決誤國事又舒蘄黃三州實
為江西屏蔽見聽本司節制亦無軍馬內舒州隸劉光
世蘄黃州隸岳飛臣近已具奏聞乞於劉光世軍中摘
那二千人屯駐舒州於岳飛軍中摘那四千人屯駐蘄
黃州緩急聽臣節制亦未奉指揮伏望聖慈特降睿旨
下都督府如臣前奏所乞差吳錫等軍一萬人充江西

大使司軍馬仍令劉光世岳飛分兵屯戍舒蘄黃州與
江西相為表裏庶幾敵人不敢窺伺一路生靈恃以無
恐不勝幸甚臣以衰病難當重寄已具奏乞依舊在外
宮觀差遣必冀矜從然不敢以將去之故不為國家深
慮至計伏望聖察

乞宮觀奏狀

右臣昨蒙聖恩除今任差遣臣以憂患之餘早衰多病
三具奏辭免皆蒙降詔不允及賜以親筆趣行臣不敢

仰違威命黽勉就道上章請覲正欲面奏難當委任之意既獲瞻望清光特荷眷獎不容遜避且蒙宣諭委以推行賑濟聖心怛惻至于再三臣所以不敢固辭者亦欲少効尺寸以報大恩而自到任以來適當倉庫匱竭新陳不接之際夙夜憂慮啓處不遑用是宿疾間作動多眩瞽深慮曠闕復致人言今幸賑濟稍已就緒秋成有望人情漸蘇實無規避之嫌敢瀝血誠仰干天聽伏望聖慈特加矜憐許令依舊在外官觀庶幾就門可以

養疾異時復被驅策誓極靡捐以圖報稱

乞宮觀劄子

臣兩具奏聞乞罷帥守之任除一在外宮觀差遣未奉
回降指揮伏念臣自建炎初誤蒙任使適當艱難之時
獨持戰守之策孤危寡與屢遭謗誣仰賴聖明脫身九
死今得承乏方面親覩中興豈不知幸然臣福過災生
早衰多病私門禍故弟妹喪亡情悰無聊志慮凋落多
憂健忘拜跪艱難近日以來頻在假故深慮妨廢職事

益負素餐之譏所以不敢久當分閫之寄屢上請開之
章誠恐一有踈虞誤陛下委任之意雖殺身不足以塞
責伏望聖慈哀憐特降睿旨檢會臣前奏早賜矜允使
得休養山林尋訪醫藥於未死間獲觀陛下恢復中原
攄憤千古臣之志慮畢矣干冒天威無任惶懼待罪之
至

催差軍馬劄子

臣契勘近具劄子奏陳乞差元所請本路軍馬一萬人

及於劉光世岳飛軍中摘那軍馬於舒蘄黃州駐劄未
奉回降指揮近聞劉光世軍馬已起發往廬州岳飛軍
馬已起發往襄陽府本路所乞軍馬未蒙都督行府差
到沿江一帶並無控扼竊慮賊情狡獪或有窺伺乘間
擣虛無兵應援深為可慮兼契勘岳飛大軍移屯襄陽
所有錢糧並係本路應副經由蘄黃等州自沔鄂以趨
襄漢實以本路為根本以蘄黃等州為咽喉之地萬一
本路為賊所擾蘄黃等州為賊占據無兵捍禦即本根

之地動搖錢糧無自而取咽喉之地阻塞糧道無自而通襄漢之軍坐見困之為害不細若待臨時申請決致誤事所有前後累奏所乞軍馬非獨止為本路之故伏望聖慈特降睿旨於都督行府見管軍馬中摘那差撥應副及令劉光世岳飛差兵前來舒蘄黃州駐劄施行

乞截留王彥軍馬奏狀

契勘累准都督行府劄子緣本司申乞差撥防秋軍馬勘會行府見議遣兵前去關送照會今月初四日又准

都督行府劄子緣本司申乞先次摘那將兵三二千人前來本司應副相兼捉殺盜賊使喚申聞事勘會已降指揮令王彥將帶兵馬前來行府約至七月間可到候到行府日即量度差撥前來今關送照會右本司體問得王彥見在荆南府除存留營田人兵外將帶軍兵裝發舟船前來人數不多約七月盡八月初間可到江州本司緣防秋闕少軍馬及近據筠袁吉等州申報日有盜賊嘯聚作過闕兵分頭討捕已具狀奏聞并申都督

行府樞密院乞截撥王彥軍馬存留本路防秋及討捕盜賊使喚今准前項都督行府指揮候王彥到日量度差撥前去竊慮王彥軍馬到得行府已是秋深又復差撥前來須至冬月不唯往返虛費日月又慮軍馬遠涉勞頓後期誤事除已再具申都督行府乞截留王彥就便聽本司節制使喚於沿江屯駐防托及分兵前去虔吉等州討捕盜賊外伏望聖慈詳酌早降睿旨施行

小貼子


契勘本路盜賊除虔州南安軍日近有劉宣等攻破
龍南縣等處作過外其餘諸縣盜賊頭項不一已曾
開具申稟吉州近有湖南賊首王權見不伏招安依
舊嘯聚作過袁州近有黃顛叔賊馬約一千餘人馬
數十疋見在筠袁州界上作過委是急闕人兵分頭
討捕伏乞聖察

契勘本司累申朝廷乞差防秋軍馬並蒙關送都督
行府今來行府近已移司前去泗上諸將軍馬並皆

發絕竊慮別無兵將可及本路所有王彥一軍已得
都督行府指揮差撥但須到行府方始發遣前來竊
慮迂迴有失指擬秋深或有警急難使本司虛當一
路之責伏望聖慈出自睿斷許就便存留一路不勝
幸甚伏乞睿察

契勘王彥軍馬在荆南駐劄係是四川應副錢糧今
來如蒙聖慈許截留本軍在本路防托使喚即乞下
本路都轉運司將係省不係省並上供錢未應副贍

給王彥一軍伏乞睿旨施行



梁谿集卷八十八

欽定四庫全書

集部

梁谿集卷

八十九至
九十一

詳校官庶吉士_臣張溥

侍讀_臣孫球覆勘

總校官知縣_臣

楊懋珩

校對官中書_臣

潘奕雋

謄錄監生_臣

楊汝梅

欽定四庫全書

梁谿集八十九

宋 李綱 撰

表劄奏議五十一

應詔條陳八事奏狀 車駕巡幸江上起居表

乞降詔諸帥特重用兵劄子

應詔條陳八事奏狀

臣伏覩近降詔書以地震求言雖芻蕘之微亦得上達
況臣嘗備近司荷恩隆厚受知特深苟有所見其敢隱

默輒罄狂瞽冒塵天聰伏望聖慈特賜睿覽謹條具奏聞
下項

一臣聞地道積陰以靜為德理不當動動必有變春
秋二百四十二年間地震五聖人必謹而書之者
志變也漢唐以來或頻年震或一年數震變不虛
發其感名之因皆有所自可攷而知廼者六月乙
巳地震于駐蹕之所陛下克謹天戒降詔求言誠
得警懼修省之道然臣聞應天以實不以文天人

一道初無殊致唯以至誠可相感格臨變而懼變
已則忘有敬天之言無畏天之實皆不足以銷弭
變故導迎吉祥凡以無至誠惻怛之意故也夫夷
狄兵革女子小人皆為陰類願陛下致察於數者
之間每事致戒則化災為祥何難之有昔成湯遇
旱禱于桑林以六事自警而雨澤時至天人之際
應若影響不可誣也臣願陛下以應詔上封事者
特加省覽其言可採降旨亟推行之不必加賞夫

忠義之士有愛君憂國之心者但以言聽計行為志豈待賞而後勸哉至於草茅疎遠不識忌諱論議激訐亦望容貸以來直言日慎一日不以天地之變為出於偶然如日月之蝕既過則怠於修省此乃所以為應天之寶也天下不勝幸甚

一臣竊聞諸道塗車駕將有建康之幸既降旨以趣營繕又具例以勅百司此誠甚勝之舉然日俟一日未聞下戒行之詔豈猶有所疑而未決耶夫建

康在東南為形勝之地在今日為不可不駐蹕之
所臣嘗條具奏聞屢矣天時地利人事皆當捨臨
安而幸建康比者地震不在諸郡而在臨安不在
他所而在宮禁此無他天意欲陛下有所遷動避
危以趨吉而已夫懷與安實敗名昔公子重耳安
於齊子犯謀醉而遣之自齊適秦秦伯納諸晉遂
成霸業今陛下久駐蹕臨安躊躇未遷無乃有安
之意耶不然天意何以丁寧告戒之若此此天

時之不可不幸建康者一也臨安褊迫偏霸之地
非用武之國又有海道不測之虞曷若建康襟帶
江湖控引淮浙龍蟠虎踞自古稱為帝王天子之
宅此地利之不可不幸建康者二也諸將衆兵已
皆分屯淮泗陛下時乘六龍躬率六師進臨建康
則將士之氣百倍其勇號令賞罰皆出睿斷人人
願戰前無堅敵與夫深居而遙制豈可同日而語
哉此人事之不可不幸建康者三也臣願陛下斷

自宸衷不貳不疑投龜而決早降詔旨以慰士民之心庶幾中興之運不日可致伏望留神幸察

一臣竊觀古之善治兵者必多其將之員數而少給之兵所以為臂指聯屬易相運動之術漢光武之二十八將是也又必重內輕外以為強本弱枝表裏相濟之術唐府衛之兵是也祖宗制兵每將不過五千人其不隸將者每指揮不過五百人有事則臨行陣無事則歸營壘此得所謂多將員而少

給兵之法盡屯天下重兵於京畿足以制四方州
郡之兵又設禁旅拱衛王室此得所謂重內輕外
之意海內平定幾二百年靡有兵革職此之故今
陛下震皇武以圖恢復之烈盡以重兵分隸諸大
將多者至十數萬人平居已不能運掉而沉於倉
卒擾攘之際乎宿衛單弱初無正兵緩急何以衛
宸極而禦外侮此臣之所以夙夜寒心者也雖陛
下恩信足以結之威德足以服之手撫指顧莫不

從令然立國之道當為長久之策恐不應如此臣
愚伏願陛下當留聖意偏裨中有可用者親加識
擢漸付以兵使自成頭項以備緩急驅策或收召
舊人或選擇將士廣置禁旅更番宿衛使為天子
正兵考漢唐之舊制遵祖宗之成憲稍復前規銷
弭後患以早致中興之功天下不勝幸甚

一臣聞兵法欲致人而不致於人此猶棊家之爭先
法耳故善棊者之置子必能制於數路善兵者之

禦敵必能禁其四出今諸將大兵列屯淮泗又以
宰相督之可謂重矣敵人之勢亦必聚其犬羊以
抗王師則京西一帶必有力不暇及之處顧詔劉
光世專事陳蔡岳飛專事唐潁使敵人分兵以拒
我則淮泗之力紆使不能分兵則乘間擣虛吾無
遺策矣今劉光世軍已進據合肥而岳飛大軍尚
留武昌未進誠恐緩不及事坐困錢糧未見其可
伏望聖慈特降詔旨督促其行庶幾不失機會今

冬可無衝突之虞願加睿察

一臣聞行師用衆糧餉為先雖有堅甲利兵非粟無以戰雖有高城深池非粟無以守有國家者無三年之蓄曰不足而況於月支日給乃旋為之計乎去歲旱災之廣綿地數千里穀斗有至千餘錢者常賦損於減放漕計困於轉輸富平義倉匱於賑濟公私枵然皆無儲蓄使今秋復繼之以水旱其何以堪所幸天道佑順雨暘時若遂成有年江浙

閩廣悉皆登豐目今米價已減將來穡事告成粒米定湏狼戾此誠朝廷廣糴儲蓄之秋也昔趙充國討先零嘗謂塞下糴四十萬斛賊豈敢動哉由是觀之國以兵為命兵以食為天何可少緩夫穀太賤則傷農乘登豐之歲以善價廣糴官有儲蓄而農不告病是行一事而兩利也朝廷近降糴本付轉運司限數收糴固為得策然轉運司不過分降諸州諸州不過分降諸縣諸縣不過敷配人戶強

委之直而責其粟則是有和糴之名無和糴之實
非計之得也臣愚伏望聖慈特降睿旨令諸路州
郡以轉運司所分糴本專委官吏置場收糴其初
即以善價取之民間量增分數嚴立約束使無邀
阻糜費則人戶商旅自然樂輸數百萬斛不難辦
也始時民間唯患交子恐難行用今朝廷既改交
子之法以為關子即與見錢無異自可通行唯官
告勅牒須勸誘上戶使之入納亦乞令州縣以勸

誘到見錢付之糴場使之收糴庶幾革近年科糴之弊公私兩濟天下不勝幸甚

一臣竊見朝廷近年以來委辦州縣或製造器用或收買物色期限太嚴督責太峻州縣官吏不敢申明如期應命但欲塞責而不為長久之計遂使公私皆受其弊而卒無補於實用如福建之舩海舟製造滅裂尋即損壞廣南之買耕牛道里遼遠率多斃踣此皆所費不貲無益於事不可不察也夫

創造不精曷若買舟之可久遠致多斃曷若厚價以招來雖有所費蓋不得已如其不然所傷實多方朝廷用兵之際財賦窘迫豈可不計較愛惜而耗蠹於無用之地哉臣愚伏望聖慈特降睿旨今後朝廷拋降製造收買物色或期限太迫或土產非宜並許州縣申陳利害從長相度以聞朝廷更加審察而施行之庶幾公私兩便無虛費而有實利天下不勝幸甚

一臣竊見朝廷前此數年專以退避為策亦不責州郡以捍守又降詔旨許令保據山澤以自固城壁守具率皆不治循習既久往往以修城壁為生事建議官吏反受罪責如連南夫以修泉州城委官體究裴廩以修衡州城重加貶黜州郡望風畏縮無敢復議修城者夫以偷惰苟且之習而重之以朝廷威令其誰敢復冒罪責而建長久之計乎臣恐自此州郡城壁壞塹頽毀湮塞不復修矣今與

僭逆之寇壤地相接無數百里之遠而沿江表裏
數十州郡朝廷所恃以為藩籬者蕩無城池可恃
以守卒然賊馬驚近邊摩封疆不知何以禦之此
臣之所不能曉也臣愚伏望聖慈特加睿察令朝
廷熟議如捍禦之計非城池不可即乞降旨明告
中外以昨來罪責官吏自緣搔擾非以修城之故
應沿江州郡候今冬農隙許之漸次修築城池建
置樓櫓之類朝廷特與應副庶幾自保之計既備

進討之策可行天下不勝幸甚

一臣竊覩近降指揮禪林僧徒貧病不能貼納者先以常住代支續令拘收還納自非出自聖慈曲加矜恤何以及此然臣竊謂僧徒中有財利者多是律僧營生與俗無異雖重取之何所不可其禪林僧真實學道之人一餅一鉢隨時粥飯往往無餘今使之貼納非惟貧病無自而出亦有害其學道之心聖慈既加矜恤許令常住代納固已深慰物

情伏望特降指揮委州縣體究實係貧病無可貼
納之人令本寺常住代支更不拘收還納庶幾學
道之流得以安心淨業此亦仁政之一端也伏乞
睿察

右件八事謹錄奏聞伏候勅旨

車駕巡幸江上起居表

臣某言伏覩進奏院報九月一日車駕進發巡幸江上
者鑾輅順動法天道以省方靈旗指麾慰民心而伐罪

號令所及呼舞惟均臣某誠惶誠懼頓首頓首恭惟皇
帝陛下孝悌通于神明覆載侔乎天地念父兄之辱欲
救之於闕河萬里之間憫烝黎之難將拯之於塗炭十
年之後採之公論斷以必行方其發軔之初已有中興
之象勞軍細柳想按轡而徐驅督戰澶淵宜應弦而遠
遁凡為臣子咸願翼從況臣嘗備近司最蒙殊獎守藩
條於外服莫陪羈勒之餘望日御之所臨徒深葵藿之
志臣無任瞻天望聖激切屏營之至謹遣左宣教郎本

司幹辦公事臣羅薦可詣行在所奉表起居以聞

乞降詔諸帥持重用兵劄子

臣近嘗具奏論諸帥重兵盡屯淮上寇偽亦必聚其犬
羊之衆以抗王師則京西一帶必有力不暇及之處宜
詔岳飛進兵可以得志近據岳飛公文分遣兵將收復
鎮汝軍商虢等州殺獲甚衆所得糧儲不貲頗如臣之
所料然臣竊謂大兵弔伐當以招納為先不在廣行殺
戮收復境土當以保守為上不在亟務攻取願詔諸帥

約束將士使明知陛下之德意則中原士民日俟王師
之來響應影從大功易集臣又聞寇偽相與定謀不爭
城邑縱我師使深入而斷其歸路使果出此不可不戒
願詔諸帥以持重用兵勿為利誘而墮其計中則師出
萬全區區愚慮庶有補於萬一伏望聖慈特賜睿察

梁谿集卷八十九

欽定四庫全書

梁谿集卷九十

宋 李綱 撰

表劄奏議五十二

闕

乞下虔吉州守臣不得占留兵將奏狀

乞撥那軍馬奏狀

乞罷江西帥仍乞宮祠或致仕劄子

蘄州探報

繳進蘄州探報劄子

欽定四庫全書

閩

卷九十

揚聲大舉則往往無事寂無傳聞則往往深入今乃信

不可憑之探報而弛一路之防守深恐非策臣素愚惓
仰荷聖意獎遇隆厚每思竭犬馬之力以報天地之恩
而今者江西委寄之重軍馬單弱無以為防秋備敵之
計使倉卒有警旋行控告朝廷乞遣援兵必不及事孤
生靈之所望誤國家之大計雖死何以塞責臣前上章
以疾丐罷蒙恩降詔不允訓詞溫厚有邊吏戒嚴商秋
俯及之語伏讀感激不知涕淚之零然臣之所以冒昧
敢以此時而求去者非獨以難勝劇任之故正緣防秋

無備不敢虛受其責今者鑾輅時巡郡國視勞六師此
非臣子堅為去就之時臣雖衰疾未敢復有所請伏望
聖慈特降睿旨令朝廷定議本路防秋如合遣兵即乞
早摘那軍馬前來應副措置撥布控扼如不合遣亦乞
明降指揮無使日夕指準以誤士民之望不勝幸甚臣
謹遣左宣教郎本司幹辦公事臣羅薦可詣行在所樞
密院稟議如蒙聖慈特賜召對亦可以詢訪本路事宜
曲折干冒天威無任惶懼戰越之至

乞下虔吉州守臣不得占留將兵奏狀

契勘昨准都督行府劄子及樞密院劄子備坐聖旨指揮令本司招填本路闕額禁軍除將兵許本司全將勾抽外其不隸將兵諸州存留一半其餘一半許本司勾抽教閱以備緩急使喚本司已遵奉聖旨指揮行下諸州除江州興國軍係沿江州郡合行措置控扼其所管不隸將兵盡皆存留更不起發止起發到筠州撫州臨江建昌南安軍一半不隸將兵人數全然不多其吉州

虔州見屯將兵依元降指揮係合全將聽本司勾抽使
喚緣為兩州有盜賊殘黨理宜存留一半將兵彈壓遂
止行下東南第六將并虔吉兩州起發見管將兵一半
前來分布控扼使喚雖已行下勾抽深慮兩州守臣不
念輕重緩急之勢惟務占吝以盜賊為名妄有奏陳不
肯如期起發有誤指準竊緣江西一路唯洪州江州興
國軍最係沿江控扼緊急去處若有軍馬防捍大敵即
可以保全一路不致侵擾其虔吉兩州皆係內地吉州

盜賊目即並已衰息虔州雖有些小殘黨其存留一半將兵自可措置彈壓伏望聖慈特降睿旨令朝廷行下兩州守臣遵奉元降聖旨指揮及依本司措置止許存留一半將兵不得盡數輒有占留以誤大計一路不勝幸甚

乞撥那軍馬奏狀

右臣近據舒蕪黃等州探報偽齊淮河北州郡順昌府陳蔡等州遂平褒信等縣皆有人馬駐劄及八月二十

二日偽齊人馬侵犯德安府應山縣作過戰敗官兵殺死趙將又據興國軍申京西宣撫司劄付黃州八月二十六日准都督行府劄子指揮令管下黃州預先踏逐險固移治去處緩急遷移保守不管少有誤事仍令密切施行不得張皇致人民警擾又據轉運判官逢汝霖公文今月二十四日准金字牌降到御寶封下樞密院劄子九月十九日樞密院奏勘會岳飛見提大兵於襄陽岳鄂一帶措置邊事其本軍合用錢糧係江西及朝

廷應副皆取道九江方至鄂渚日近據探報寇偽賊馬聚兵陳州順昌府意欲侵犯淮西其江州最係緊切控扼去處兼慮緩急阻遏糧道理宜措置右奉聖旨令岳飛摘那一項軍馬疾速順流前來江州屯駐照應措置控守仍具所差統兵官職位姓名起發日時申樞密院其合用糧料委達汝霖應副臣契勘近累具奏聞本路當上流重地沿江一帶要害去處並無兵將控扼深慮寇偽窺伺間隙衝突侵犯乞自朝廷遣發本司合得軍

馬應副防秋分布使喚雖蒙關送都督行府至今未曾
差撥今據前項逐州探報及都督行府樞密院劄子其
探報賊馬事件類皆符合如臣平時所料本路事宜委
是緊急雖有指揮令岳飛摘那一項軍馬前來江州屯
駐緣岳飛大軍見在襄陽府道路遙遠未必能如期前
來及雖遣發元無限定人數勢湏鮮少有誤指準若不
別行措置決致上誤國事伏望聖慈矜念本路全無得
力兵將可以控扼捍禦緩急賊馬侵犯必至疎虞一路

生靈所係非細臣以疎遠孤寒寡援虛當重任萬一敗事雖死不足以塞責斷自宸衷特降睿旨令都督府日下摘那一項得力軍馬差官管押星夜前來應副使喚會勘諸州及朝廷探報寇偽賊馬聚於陳潁者三萬餘人如或侵犯本路沿江及諸處控扼非萬五千人不可除本路措置見管兵可得四千人外尚闕萬一千人又恐朝廷以淮泗間見有邊事雖遣兵馬不能及此數目致令分布使喚不足勘會福建路統制官李貴見部人

兵在汀州駐劄廣南東路統制官韓京見部人兵在循
梅州駐劄皆與本路相隣李貴近殺敗劉大醉賊馬韓
京近殺敗劉宣賊馬虔寇漸向衰息不敢侵犯兩路欲
乞特降指揮於李貴韓京所部軍馬逐急更各摘那一
半差近上得力將官部領赴本司應副控扼使喚候防
秋罷日各遣歸逐路屯劄去處庶幾聲援稍振竭盡愚
慮或可以效犬馬之力備禦強敵保全一路以報聖恩
萬分之一死且不朽如以臣今來陳請不合廟謨即乞

朝廷察臣不材先次罷黜無使虛受誤國之責亦臣區區之至願也謹瀝血誠干冒天威無任惶懼戰越之至

貼黃

臣所乞摘那韓京李貴一半兵將如蒙聖慈矜允即用金字牌遞角降付韓京李貴軍中并福建廣東路帥司及本司照會庶幾早得被受不至後時伏望聖察

臣近據岳飛公文稱強敵兵少錢糧不繼已勾回幹

事軍馬臣竊慮近降指揮令岳飛摘那一項人兵前來江州屯駐照應防守亦未必可以指準伏乞聖察乞罷江西帥仍乞宮祠或致仕劄子

臣輒瀝血誠仰干天聽退惟冒瀆死有餘罪伏念臣鄙樸無取誤蒙聖恩起廢於十年流落之餘畀付以一路兵民之寄夙夜黽勉期稱所蒙適丁偽寇猖獗之秋當為防冬捍守之計而臣本司軍馬盡已撥隸諸將沿江千里要害之地初無數旅控扼之兵累具奏陳未蒙差

撥今者邊郡探報羽檄交馳朝廷行移星火緊急皆謂賊馬屯聚將為擣虛之謀惟臣本路空虚初無禦敵之具倘使犬馬之衆來犯封疆則夫士民之心何所倚仗臣已再上章疏控告朝廷乞摘那都督行府之偏師及勾抽福建廣東之半將濟此危急庶能保全臣聞有言責者不得其言則去有官守者不得其職則去帥守江西臣之職也朝廷付臣以一路委任重矣不知緩急之際責臣以守乎不責臣以守乎責之以守則必與之以

可守之具不責之以守則非獨朝廷今日事體不可如此亦非臣平日之素志也如蒙朝廷俯從危懇使兵力粗可支梧則賈誼所謂守圉捍牧之臣誠死城郭封疆者臣雖無似竊庶幾焉倘或所陳不合廟略即乞朝廷以臣不材先次罷黜使得歸老山林保全晚節亦臣區區之至願伏望聖慈特降睿旨憐臣堅請力爭蓋憂於誤國察臣難進易退非薄於愛君早賜矜從以安愚分謹齋沐親書劄子干冒天威無任惶懼戰越待罪之至

貼黃

臣竊以防冬之際雖非守臣可以乞去之時然臣條具利害請乞軍馬一路捍守之計凡二十餘次不蒙朝廷差撥今來探報危急實難虛任重責伏望聖慈特降睿旨除臣一在外宮觀或許臣守本官致仕以養衰疾取自聖裁早賜矜允

蘄州探報

今月二十六日准光州牒今月二十一日戌時據探事

效用蔣賢等到州供稱今月二十一日未時有偽賊馬軍二百餘疋於谷口渡已過淮南岸及見有馬步軍接續過淮前來不見的實數目賢等奔走前來執覆牒契勘據探報賊馬已是渡淮連夜決來攻圍本州委是危急請照會施行者右謹具申江西安撫制置大使司謹狀并小貼子探報今來賊兵係孔彥舟作先鋒緣本人舊充蘄黃州鎮撫使在蘄州屯駐熟知地利竊慮窺伺蘄黃州一帶為害不細伏乞速賜指揮施行

繳進蘄州探報劄子

臣已具奏方欲遣發間據蘄州公文准光州探報九月二十一日有偽賊馬軍二百餘疋於谷口渡已過淮南岸及有馬步軍接續過淮前來不見數目探聞係孔彥舟作先鋒緣本人舊充蘄黃州鎮撫事竊慮窺伺蘄黃一帶申本司照會臣契勘近據淮西諸州探報寇偽聚兵陳蔡順昌府意欲窺伺淮西今來蘄州探報賊馬已渡淮前來淮西一帶州軍並皆已得朝廷指揮移治更

無限阻直可徑到大江本路沿江要害合行控扼去處
並無兵可以分布使喚委是危急伏望聖慈特降睿旨
日下差發得力成頭項軍馬星夜前來應援措置防扼
庶幾尚可支梧若只倚仗已劄岳飛分撥兵將決致誤
事所有蘄州探報公文真本繳連在前謹具進呈取進
止

貼黃

臣契勘前件探報雖已密行下江州興國軍等處措

置防扼緣逐州亦是闕兵分布使喚深慮朝廷遣發
兵將并岳飛分撥軍馬未到間賊馬徑渡江前來江
西作過洪州兵既不多城壁頽毀方欲下手修治全
然未有次第亦無樓櫓及防城器具等委是難守萬
一倉卒欲乞許本司隨宜措置以待援師更合取自
朝廷指揮伏乞聖察

梁谿集卷九十

欽定四庫全書

梁谿集卷九十一

宋 李綱 撰

表劄奏議五十三

論擊賊劄子

再乞罷帥劄子

乞差發軍馬劄子

奏陳防秋利害劄子

進道君御書碑本奏狀

進皇帝御筆詔書奏狀

乞下淮西宣撫司差軍馬前去光州駐劄奏狀

乞施行虔州占各將兵奏狀

乞撥韓京等軍馬奏狀

論擊賊劄子

臣竊觀自古用兵者相持既久則非出奇不足以取勝
曹操袁紹官渡之事是也王師與寇偽相持於淮泗間
幾半年矣前日岳飛之舉我出奇也惜乎以錢糧不繼
而勾回幹事軍馬未能成功今日賊馬渡淮彼出奇也
若能設策破之則奇反在我臣願陛下連遣得力兵將

自淮南前來蘄黃間約岳飛兵相為犄角以夾擊之期
於必勝以復陳蔡則淮泗之師亦自當解大功可成至
於江南屯兵控扼以捍奔衝自是一段不可闕也伏望
聖慈特賜睿察取進止

再乞罷帥劄子

臣近者冒萬死干天聽乞罷臣江西帥任依舊除一在
外宮觀或守本官致仕未奉俞允伏念臣材能無取誤
蒙聖恩帥守一路夙夜匪懈願效涓埃以圖報知遇之

萬一而臣自今春入覲之初即論本路為上流重地去敵境不遠朝廷建置大帥付兵二萬人近來撥隸他將靡有存者竊慮不足以折衝禦侮鎮服一方乞差萬人庶可集事伏蒙宣諭以臣言為然既而降付朝廷止是關送都督行府累具利害申都督行府止云見議遣兵自春徂冬初無一人一騎至者方用兵之際邊報緊急之秋付臣千里之寄而軍馬單弱曾不足以薄具防守臣雖至愚豈敢貪戀寵祿虛任重責哉所以不避斧鉞

之誅乞歸山林非獨以衰年多病不任繁劇之故也重
念臣自靖康以來為國深慮心之精微衆人不達皆以
主戰歸之姓名誤落於寇中尤為敵人之所不喜使其
知臣塊守空城於此無兵可以為用其致寇必矣如臣
者固無足道然嘗為大臣被遇三朝使失守殞身上累
國體雖死不足以塞責伏望聖慈哀憐特降睿旨檢會
臣前奏所請宮觀或致仕早賜施行臣不勝幸甚謹齋
沐親書劄子冒瀆天威臣無任惶懼戰越待罪之至

乞差發軍馬劄子

臣伏准御前金字牌降下樞密院今月十七日劄子以臣乞除在外宮觀差遣或許守本官致仕備奉聖旨不允令學士院降詔仰荷聖恩但深感涕伏念臣材能無取誤蒙睿獎起於閑廢之中付以方面之寄夙夜匪懈願效涓埃以圖報遇之萬一自到本路適當旱暵闕乏之餘金穀細碎皆躬親料理粗能支梧應岳飛大軍錢糧亦不敢闕乏建置營房修葺城壁制造器甲

安集流移招捕盜寇皆稍就緒惟是軍馬單弱不足為一路防守之具自非朝廷應副則新招烏合之衆何足倚仗累具奏陳未蒙差撥近者邊報警急賊馬渡淮侵擾淮西州縣沿江一帶要害去處並無控扼人情震恐臣深慮倉卒之際或有衝突與其無兵捍禦受失守之誅曷若控告君父為退休之計情迫辭切日虞譴訶豈謂皇帝陛下察其精誠憫其拙直既賜以詔書不容遽去又諭以所乞兵馬別作施行雖父母之於子恕其愚

而極其急不是過也今者王師大捷賊兵遁逃固足以紓目前之憂為中外之慶然月始初冬解嚴之期尚遠兵貴預備黠敵之衆尚多正當益虞大敵愈修軍政防患於不必防之地持勝為不可勝之謀用正為奇濟虛以實則江西一路尤今日所當留意也臣竊恐朝廷以既捷之後便謂可以無虞兵馬不必調發間隙不必隄防則非臣所敢知也伏望聖慈速降睿旨所遣本路軍馬早賜施行及臣所乞李貴韓京一半兵將特如所請

庶幾捍禦有備可以輯寧一路仰報大恩衰病之軀終冀矜從得安閑散干冒宸聰無任惶懼戰越之至

奏陳防秋利害劄子

臣伏覩樞密院劄子行下捷報劉光世張俊楊沂中等大破偽齊賊馬於淮淝之上斬馘擒捕甚衆殘黨遁歸淮北此誠陛下天錫勇智道兼神武駕御將帥恩威並行所致露布所傳中外同慶然臣竊見間探所報偽齊乞兵於金人其統領來者如四太子龍虎大王渾女渾

金牌郎君之類頭項頗多未聞有渡淮而南者其侵犯淮淝及光山六安等處作過止是李成孔彥舟叛將簽軍深慮賊情狡獪匿重兵於後而以簽軍來嘗我師若一勝之後兵驕氣惰則為患有不可勝言者加以時方初冬去解嚴之期尚遠合當措置防守去處更宜嚴為之備伏望聖慈降詔諸將既加獎諭又戒其無以戰勝而驕益務淬礪以待大敵仍命朝廷按圖以視諸路某路固實當設疑以欺賊兵某路空虛當增兵以禦侵掠

使江淮之間表裏相資首尾相應萬一寇騎衝突墮吾
術中王師能取勝於金寇則恢復之功在此一舉不再
籍矣臣以迂陋疎遠輒議大事罪當萬死伏望聖慈特
加審察取進止

進道君皇帝御書碑本奏狀

右臣今年三月內蒙恩賜對內殿嘗以道君太上皇帝
所賜御書一軸進呈及乞將刻到碑石等進御府伏蒙
宣諭許令投進臣近於福州舊寄居處取到道君太上

皇帝御書碑石兩段及元打下碑本四十八張已標背
一軸用匣複封全謹差人齎赴通進司投進伏望聖慈
特降睿旨宣取臣無任惶恐戰越之至謹錄奏聞

進皇帝御筆詔書奏狀

右臣昨於去年十月內蒙恩除今任差遣三具奏辭免
伏蒙聖慈特降親筆詔書趣行又於今年三月內赴任
至江西界首准御前金字牌降下親筆詔書以本路旱
災飢民之食令勸誘積米之家盡數出糶以濟流殍之

苦臣到任所以前件親筆詔書刻之琬琰置州治中以垂永久謹裸背成軸用匣複封全差人齎赴通進司投進伏望特降睿旨宣取臣無任

乞下淮西宣撫司差軍馬前去光州駐劄奏狀

今月二十日據興國軍狀申十月十五日未時據進武副尉本軍使臣何詮申今月十三日戌時有黃州差去探報衙前華昇申今月初十日到沙碣市見光州知州王敦武以下官員般移老小軍民在沙碣市石盆山寨

住泊探到偽賊孔彥舟等人馬見在淮河東北畔朱高市劄寨及據權發遣興國軍左朝請大夫王粵劄目竊觀唐史張巡許遠固守睢陽遂使賊兵不敢越睢陽而犯江淮史臣稱之曰張巡許遠以疲卒嬰孤城抗方張不制之虜鯁其喙牙使不得搏食東南牽制首尾而唐全得江淮財用以濟中興今來偽齊遣孔彥舟繫橋渡淮攻圍光州首尾半月無兵救援致使光州官吏奮發忠義出城擊退其功績誠可嘉也孔彥舟引兵入六安

軍前去而光州於今月初六日夜二更兵民皆出城往
光山縣名為移治不知所向是光州官吏慮恐賊兵再
來攻圍依前無人救援緩急城陷則一城皆被殺虜所
以棄之而遠遁深恐偽齊探知移兵前來據守光州繫
橋運糧時遣賊兵前來侵擾蘄黃等州則江西日有警
急契勘江西諸州例闕城壁不得不為之慮兼淮南州
軍方始安定豈可再致殘破所據興國軍探報及權發
遣興國軍王粲劄目在前本司契勘光州係淮西路分

接連陳蔡偽境自兵興以來雖累經殘破然最係控扼
去處近者孔彥舟賊馬攻圍累日官吏兵民竭力捍守
賊馬退去即是光州城壁尚猶可守緣得淮西帥司指
揮許之移治又慮賊馬再來攻圍無兵應援遂於賊退
之後官吏軍民並皆遷徙出城就光山縣屯泊今據興國
軍守臣王粲前項陳述深慮偽齊探知移兵前來據守
光州繫橋運糧時發賊兵侵擾蘄黃等州則江西日有
警急不可不慮事理誠為切當伏望聖慈特降睿旨下

淮西宣撫司疾速差撥一項軍馬前去光州屯駐却令
光州守臣率官吏軍民依舊歸城措置捍禦庶幾不致
誤事其蘄黃州已得湖北路宣撫司令相度移治指揮
亦乞朝廷詳酌施行

小貼子

契勘光州或為賊所據則蘄黃又須移治江北更無
捍蔽自江以南沿流險要去處既無軍馬可以控扼
州縣又無城池可以自固使賊渡江占據州縣為患

不息伏望聖察

乞施行虔州占各將兵奏狀

據虔州申准安撫制置大使司劄子已行下東南第六將依限統押已團結下一半將兵前來分布控扼使喚本州先准使司劄子指揮團結一半將兵聽候防秋使喚尋下東南第六將團結將下見管近軍二千九百二十五人緣為龍南等縣并廣東目即皆有盜賊逐次分遣將兵前去逐處討捕及分差州衙正副將路分押隊

及諸處防把委是人數稀少差那不行兼倉庫虛乏無
可預借欲望與免起發存留本將捍禦彈壓庶免別致
生事申本司契勘東南第六將兵自來合聽帥司節制
近因本司起請防秋軍馬准都督行府及樞密院劄子
備坐聖旨指揮本路將兵遇緩急全將合聽本司差撥
使喚本司緣為虔州管下尚有土賊殘黨未致淨盡已
行下本將存留一半在本州彈壓外其餘一半將兵先
次團結成隊伍日逐訓練以備本司緩急勾抽使喚已

備坐申朝廷去訖本司近來不住承據江北蘄黃州探報寇偽賊馬侵犯淮西州縣事宜緊急沿江合行措置把截去處別無軍馬防守遂於九月二十八日以後排日入遞及專差使臣計一十五次劄下虔州勾抽工件已團結下一半將兵前來本司分布控扼使喚亦已具因依奏聞外今據前項陳述委是本州當職官不以國事為意但欲盡數占留將兵却將本司已團結人數先期散在諸縣故作占破體問得虔州管下諸縣今年豐

熟盜賊漸已衰息雖有些小殘黨去處其存留一半將
兵一千五百人自足彈壓措置今來本州全不體認探
報緊急事有輕重輒以盜賊為名占吝不肯發遣顯是
並不遵奉聖旨指揮及故違本司節制除已再行催促
發遣外伏望朝廷檢會本司前奏更賜指揮施行

小貼子

契勘朝廷一路置帥正為節制軍馬於事宜緩急之
際得以度量輕重抽差使喚今來本司差撥虔州一

半將兵應副沿江防扼非特當邊報警急之際又係
遵奉近降聖旨指揮其虔州當職官吏輒敢妄以盜
賊為名占吝不遣故違聖旨及本司節制致乏軍興
實緣臣人微望輕不足表率一路遂令列郡陵侮帥
司伏望聖慈特賜罷黜其虔州官吏亦乞特降睿旨
施行

乞令岳飛兵前來江州仍許聽本司節制奏狀

契勘近據轉運判官逢汝霖公文准樞密院九月二十

六日劄子樞密院奏勛會岳飛見提大兵於襄陽岳鄂
一帶措置邊事其本軍合用錢糧係江西及朝廷應副
皆取道九江方至鄂渚日近據探報寇偽賊馬聚兵陳
州順昌府意欲侵犯淮西其江州最係緊切控扼去處
兼慮緩急阻遏糧道已奉聖旨令岳飛摘那一項軍馬
疾速順流前來江州屯駐照應措置控守其合用糧斛
委逢汝霖於樁管應副岳飛米內取撥五萬石前去支
用右奉聖旨令岳飛依已降指揮疾速摘那前去本州

屯駐措置控守仍具所差統兵官職位姓名起發日時
申樞密院申本司照會本司緣有孔彥舟賊馬攻圍光
州探報備坐前件聖旨指揮牒湖北路宣撫司疾速差
兵前來江州駐劄續據湖北宣撫司簽廳公文稱宣撫
岳少保見為目疾在假本司見調發官兵五千人并車
戰船前去蘄陽屯駐請照會契勘蘄陽係江北岸屬蘄
州管內去江州地里寫遠其江州係江南岸最為要害
去處沿江渡口並無軍馬控扼緩急難以相照伏望聖

慈特降睿旨下湖北路宣撫司依元降聖旨指揮別差
一項軍馬前來江州屯駐與蘄陽軍馬照應相為表裏
及乞朝廷檢會臣近奏屯駐江州軍馬許權聽本司節
制庶幾捍禦賊馬可以保全一方不致誤事

小貼子


契勘今來賊馬侵犯淮西州軍與江西止隔一水沿
江州郡如洪州江州興國軍最是要害去處全無軍
馬控扼事屬危急如今岳飛軍馬不來江州屯駐

及雖來江州屯駐不許權聽本司節制實恐無益於
事伏望聖察

乞撥韓京等軍馬奏狀

契勘本司近具奏聞以軍馬單弱防冬之際緩急賊馬
侵犯無以捍禦乞自朝廷遣發及福建路見在汀州駐
劄統制官李貴廣東路見在循梅州駐劄統制官韓京
所部人兵內各摘那一半差近上得力將官部領赴本
司應副使喚候防冬罷日各遣歸逐路屯劄去處未奉

回降指揮竊緣本司昨得聖旨指揮辟置都統制官一員節制三路軍馬討捕虔寇今來已蒙朝廷許辟左武大夫吉州團練使任仕安充本司都統制韓京李貴兵馬自合聽受節制見今屯江州與本路相接朝廷遣發軍馬未到間如得權宜差撥應副庶幾聲援稍震可以備禦強敵保全一路伏望聖慈特降睿旨檢會前奏速賜施行



梁谿集卷九十一